

Noticia
Transparente
di Gobierno

ISLA ONLINE

Diaranson 19 Mei 2024

Email: IslaOnline@gobierno.aw Tel: 528-4952

ARTE DI MURAYA
SAN NICOLAS



**STABILIDAD
Y
PROSPERIDAD**

2 0 2 4



Gabinete Wever-Croes



COLEGIO SAN ANTONIO TA STIMULA ALUMNONAN RIBA E AREA DI NAIK


Studiantenan mes ta traha nan weganan y haci e coding

Diamars mainta dia 18 di juni, studiantenan di Colegio San Antonio a presenta nan proyectonan di NAIK (Natuurkunde-Informatiekunde) na Prome Minister Evelyn Wever-Croes.

Despues di un caluroso bonbini di parti di cabesante di Colegio San Antonio y docentenan, Prome Minister hunto cu Minister di Enseñansa y Deporte Endy Croes a wordo dirigi na un lokaal special unda e alumnonan a prepara nan proyectonan. Akinan studiantenan di Mavo 1 te cu examenklas, cu hopi orguyo, a presenta nan proyectonan di Natuurkunde y Informatiekunde, NAIK, na e mandatarionan. Cada alumno a duna su propio presentacion mustrandu su habilidad, creatividad y inteligencia y por a mira cuanto talento tin entre e hobennan aki.

Durante e mainta aki por a mira con alumnonan mes ta traha nan weganan y haci e coding. Tawata interesante pa wak con ta combina e Informatiekunde y e Natuurkunde a traves di un robot cu ta haci e testnan di Natuurkunde, asina e alumnonan ta compronde miho e materia. Por ehempel por a observa kico ta determina e velocidad di un auto y con e peso di esaki ta influencia e velocidad.

Pa Prome Minister di Aruba tawata un placer di por a presencia e demostracionnan aki riba e tereno importante di tecnologia. "Mi ta contento di wak con Colegio San Antonio ta stimula



e hobenannan riba e area importante aki ya cu esaki ta e trabounan di futuro. Mi ta felicita y alabes gradici e docentenan y principalmente e alumnonan pa a comparti e mainta aki cu nos y pa transmiti nan talento y conocimiento. Proyectonan asina no solamente ta fortalece e conocimiento di e alumnonan, pero tambe ta aporta na futuro profesionalnan riba e tereno aki cu ta uno di gran importancia pa e añanan cu ta bin", Prome Minister a remarca.



Prome Minister Evelyn Wever-Croes:
Ban proteha nos muchanan

REALIDAD TRISTO: 99% DI ABUSO SEXUAL DI
MUCHA, E ABUSADO TA FAMIA OF CONOCI!

Desde inicio di Gabinete Wever-Croes na 2017, Gobierno di Aruba ta haciendo tur posibel pa atende cu e problema delicado di abuso y abuso sexual di menor. Pa trece mas conscientisacion ainda den pueblo, Gobierno a decreta luna di april como Luna Nacional Contra Abuso di Mucha. Riba prevencion, ehecucion y conscientisacion, Gobierno hunto cu Comision Nacional di Abuso di Menor, organisacionnan y fundacionnan gubernamental y no gubernamental, ya a tuma diferente accion pa yuda preveni y combati e crimen grave aki contra nos muchanan.

Sinembargo, e ta un berdad hopi tristo cu e problematica aki ta cuminsa hopi cerca di cas mes, di esnan hopi cerca di un mucha. For di un estudio haci, ta alarmante e cifra y informacionnan obteni di casonan di abuso di mucha. 99% di casonan na unda muchanan ta wordo abusa sexualmente, ta wordo abusa door di personanan cu e victima conoce. E por ta un amigo di cas, of amiga of amigo di mama y tata, pareha nobo, door di omo, door di welo, of padrastro. Esakinan ta personanan cu ta cerca di e muchanan y kendenan e muchanan ta confia. Personanan kendenan a mayornan a confia pa laga nan yiunan den nan cuido.

Esaki ta un indicacion fuerte cu e problema mas serio no ta ley, Gobierno of hues. E problema mas serio ta den famia. Eynan nos mester enfoca. Eynan Gobierno no por drenta facilmente. Esey ta responsabilidad di cada famia, di cada persona cerca di e mucha cu e mucha ta confia. Por cambia tur ley pero si den famia e abuso sigui te hasta wordo permiti y tolera, nos ta sigui faya nos muchanan. Y ta hunto so nos lo preveni y combati e crimen aki contra nos menornan inocente.

“Nos mester confronta e berdad aki, aunke cu e ta incomodo y delicado. Abuso hopi biaha ta socode door di personanan di confiansa, personanan cu mester ta esunnan cu mester brinda proteccion na nos muchanan. Nos por cuminsa pa evita 99% di e casonan aki door di wak miho cu kende nos ta laga nos yiunan y reconoce señalnan den e mucha of den esnan cu ta wak pa e mucha. Door di ta consciente, acepta loke ta pasando, y door di accionnan preventivo, nos por traha pa un futuro caminda cada mucha ta crece den un ambiente liber for di e garan di abuso. Nos muchanan merece miho”, Prome Minister Evelyn Wever-Croes a expresa.





MINISTERIO DI TURISMO Y SALUD PUBLICO TA CONTENTO CU E PROGRESO DI DIGITALISACION DI E ARUBA HEALTH APP

Minister di Turismo y Salud Publico sr. Dangui Oduber ta contento con e progreso di digitalisacion di e Aruba Health Application ta canando. Un bunita proyecto unda pronto lo digitalisa henter e sector di cuida medico haciendo uzo di tecnologia y innovacion via e Aruba Health App.

Setar hunto cu Ministerio Salud Publico y AZV ta trahando duro ariba e proyecto pa asina brinda un miho servicio na nos aseguradonan. Cu e avanse di e proyecto, pronto aseguradonan por bay experiencia un cambio grandi den e manera cu ta haci cita na nan dokternan di cas via e plataforma di Aruba Health Application.

Den cuadro di mehora calidad y servicio di cuida na Aruba e plataforma di "Aruba Health App" lo bira un pa traha cita via MiDokterDiCas, tambe por ricibi receta prescribi via MiRemedi y alabes haya otro informacionnan importante di e pashent su historia medico. E innovacion di e plataforma aki ta permiti e aseguradonan pa yega na nan informacion medico 24 ora pa dia cu ta haci e proceso mas rapido.

Minister Dangui Oduber a pone e vision y conhuntamente cu Setar y AZV a logra introduci un plataforma inovativo pa Aruba unda e pashent ta central y mas acceso y control di nan salud. Segun e mandatario esaki ta un "era nobo" pa asina digitalisa henter e sector di cuida medico, cu un resultado pa sigui mehora tur e

servicionan y e calidad di cuida pa tur dokter di cas por traha na un manera mas eficiente, transparente y mas rapido y asina tambe e comunidad por ta mas informa y sinti nan mes den control di nan salud y calidad di bida.

Minister Dangui Oduber ta gradici tur e partnersnan cuta trahando incansablemente pa pronto por lansa y introduci e plataforma di Aruba Health App na e pueblo di Aruba. ■





MINISTER ENDY CROES A ELABORA RIBA E TRABOUNAN ANDANDO NA VELD DI MADUSHI STARS NA SAN NICOLAS

Recientemente, Minister Endy Croes a bishita e veld di Madushi Stars pa mira e progreso di e trabounan cu ta andando. Manera ta conoci, algun luna pasa a baha e luznan bieu pa aloca e luznan led ultramoderno di e marca Phillips. E luznan LED ta bon protegi contra saltpeter y ta "marine coated" pa asina nan por wanta hopi aña. Tambe a laga traha bracket completamente nobo. Siman pasa a instala e luznan, cual ta midi un averahe di 500 lux cu ta cuadra cu e standardnan internacional.

Ademas di esaki, lo verf ful e veld. Despues cu finalisa e trabounan lo haci apertura oficial di e veld. "Por a nota cu e famianan den bisindario, esnan cu ta atende cu e veld y nos amigo Sr. Remigio Kock ta hopi contento cu e proyecto aki", Minister Endy Croes a expresa. Finalmente, e mandatario di Deporte a indica cu tin varios proyecto cu ser ehecuta caba pa deporte en general di Aruba y varios proyecto cu ainda ta den proceso. Cu disciplina, dedicacion y determinacion ta logra.





Despues di reunion historico cu REPSOL: CU REALISACION DI E PROYECTO DI REPSOL NOS TA CREANDO UN FUTURO NOBO



Minister di Energia Glenbert Croes hunto cu director di RDA/ FMSA, director di WEB y director di Utilities Aruba NV, a reuni cu e compania di energia Repsol basa na Madrid. Durante e reunion a delibera riba e diferente oportunidadnan cu tin, den cuadro di transicion energetico, proyectonan di energia renobabel y riba e tema di re-activacion di e patio di tankinan di RDA.

Minister Croes a califica e reunion aki como uno historico pa Aruba pasobra "cu realisacion di e proyectonan aki nos ta creando e futuro nobo cu nos futuro generacion tin derecho riba dje".

Minister Croes a indica cu e oportunidadnan aki, lo yuda pais Aruba cu un actividad economico impresionante pero totalmente diferente na e tempo di refineria. E ta un aspecto cu ta duna un impulso economico diferente na loke turismo tabata, a representa y lo keda representa pa desaroyo economico di pais. Hunto cu e realisacion di e Aruba Hydrogen Valley, Gobierno di Aruba ta tumando un rumbo energetico cu lo bay bira un pilar economico di gran importancia, mirando cu e lo genera prosperidad economico pa e comunidad di Aruba en general.

"Repsol ta un di e empresanan di energia mas grandi na mundo, y nan interes expresa den Aruba pa por realiza e diferente proyectonan aki, ta un gran bendicion, y mas cu tur cos un paso historico. E representantenan di Repsol pronto lo ta na Aruba, na unda nos lo tin e oportunidad di presenta na e diferente proyectonan. Mi ta inmensamente orguyoso cu nos a haya e oportunidad aki, pasobra cu realisacion di e proyectonan aki nos ta creando e futuro nobo, cu nos futuro generacion tin derecho riba dje", Minister Croes a termina.



MINISTER THIJSEN NA RECEPCION DI DESPEDIDA PA SECRETARIO DI ESTADO VAN HUFFELEN



Na Nieuwe Kerk na Den Haag a tuma lugar un recepcion pa tuma despedida di Alexandra van Huffelen como Secretario di Estado pa Asuntonan di Reino y Digitalisacion. Na e ocasion aki Minister Plenipotenciario mr. Ady Thijsen a gradici Alexandra van Huffelen pa e bunita cooperacion durante di e periodo cu e tabata Secretario di Estado. Tambe Minister Thijsen a gradici Alexandra van Huffelen pa su comprension y su amor y afecto grandi pa e parti Caribense di Reino Hulandes. Sr. Thijsen a desea señora Van Huffelen tur clase di exito den loke elo bai haci despues di e funcion di Secretario di Estado.

Durante e programa oficial un video a wordo pasa cu palabranan di gratitud y aprecio di mandatarionan di e parti Caribense di Reino, na unda tambe Prome Minister di Aruba mr. Evelyn Wever-Croes tabata tin un mensahe pa Alexandra van Huffelen na unda tambe e prome mandatario di Aruba a gradici Secretario di Estado van Huffelen pa e cooperacion entre Hulanda y Aruba.

Den su discurso Alexandra van Huffelen a mira bek riba e dos aña y mei cu e tabata den e funcion aki. Ela para keto na su bishitanan na y su intercambionan cu e mandatarionan di e parti Caribense di Reino. Tambe e trabaonan cu ela logra realisa riba e agenda di digitalisacion. E mandatario a bisa su hopi trabao a wordo haci, pero cu lastimamente door di e caida di e Gabinete Rutte IV, tin proyectonan cu no por e keda finalisa. Finalmente ela bisa di ta spera cu su sucesor sigi riba e mesun caminda pa loke ta e Relacionnan den Reino y Digitalisacion.

E recepcion a sigi den un esfera hopi ameno cu musica di Juni Juliet.



2024

AÑA DI STABILIDAD Y PROSPERIDAD



Gabinete Wever-Croes

Ora nos cana den cayanan di San Nicolas cu ta dorna cu artenan mahestraal aki, nos ta realisa cu bunitesa por wordo haya den luganan menos spera. Arte di muraya ta e language visual cu ta conecta culturanan, na unda cu por aprecia historia, color, fantasia y dedicacion.

